

**PRAVILNIK O ZAŠTITI OD POŽARA
U
JAVNOJ USTANOVI
„COLLEGIUM ARTISTICUM“
SARAJEVO**

Sarajevo, 26. februar 2025. godine

Broj: 02-64-2/25

Na osnovu odredbi Zakona o zaštiti od požara i vatrogastvu („Službene novine FBiH“, br. 64/09), člana 27. stav (1) alineja 6. Zakona o ustanovama („Službeni list R BiH“, br. 6/92, 8/93 i 13/94), člana 14. Odluke o osnivanju Javne ustanove „Collegium artisticum“ Sarajevo („Službene novine Kantona Sarajevo“, br. 28/18), člana 34. i 38. tačka f) Pravila Javne ustanove „Collegium artisticum“ Sarajevo (br. 01-04/21 od 24.03.2021. godine, i 01-17-1/21 od 01.07.2021. godine), Upravni odbor Javne ustanove „Collegium artisticum“ Sarajevo, na sjednici održanoj dana 26.02.2025. godine donosi:

PRAVILNIK O ZAŠTITI OD POŽARA

I-OSNOVNE ODREDBE

Član 1. (Predmet)

Pravilnikom o zaštiti od požara (u daljem tekstu: Pravilnik), u skladu sa Zakonom i drugim propisima, uređuju se pitanja koja se odnose na organizaciji i funkcionisanje zaštite od požara u Javnoj ustanovi „Collegium artisticum“ Sarajevo (u daljem tekstu: JU Collegium artisticum).

Član 2. (Pojam zaštite od požara)

Zaštita od požara obuhvata skup mjera i radnji koje se utvrđuju i preduzimaju u cilju sprečavanja izbijanja i širenja požara, otkrivanja, lokalizacije i gašenja požara te spašavanja ljudi i materijalnih dobara ugroženih požarom.

Član 3. (Provođenje zaštite od požara)

(1) Ovim Pravilnikom o zaštiti od požara utvrđuje se naročito:

- a) Način organizacije i ostvarivanja zaštite od požara u JU Collegium artisticum, djelokrug rada i ovlaštenja lica zaduženih za poslove zaštite od požara, u skladu sa Zakonom o zaštiti od od požara i vatrogastvu i podzakonskim propisima;
- b) Mjere za provođenje i unapređenje zaštite od požara;
- c) Način vršenja unutrašnje kontrole provođenja predviđenih mjera zaštite od požara i način vođenja evidencije o provođenju propisanih mjera zaštite od požara;

- d) Sisem javljanja i obavještanja, postupak u slučaju požara, tehnička oprema i sredstva potrebna za gašenje požara;
- e) Način upoznavanja zaposlenih radnika sa opasnostima od požara na radnom mjestu, prilikom prijema i raspoređivanja tih radnika na radno mjesto, kao i prilikom premještanja sa jednog na drugo radno mjesto;
- f) Obaveze direktora i radnika zaduženih za održavanje opreme i sredstava za gašenje požara, kao i drugih radnika JU Collegium artisticum;
- g) Dužnosti i način ponašanja radnika u slučaju pojave požara;
- h) Način pribavljanja sredstava za provedbu mjera zaštite od požara;
- i) Odgovornost radnika zbog nepridržavanja propisanih ili naloženih mjera iz oblasti zaštite od požara;
- j) Druga pitanja u vezi zaštite od požara.

Član 4. **(Dužnost JU Collegium artisticum)**

- (1) Zaštita od požara organizuje se i kontinuirano sprovodi na svim radnim mjestima i svim objektima gdje postoji mogućnost izbijanja i širenja požara.
- (2) Dužnost JU Collegium artisticum je da na najbolji mogući način organizuje poslove zaštite od požara, da obezbijedi materijalno tehnička sredstva i opremu za zaštitu od požara i gašenje požara, te da organizuje njihovo održavanje, kontrolu i ispitivanje.
- (3) Mjere zaštite od požara, propisane ovim Pravilnikom, zakonskim i tehničkim propisima, kao i mjere koje su naređene od strane nadležnih organa, dužni su da sprovedu svi radnici JU Collegium artisticum kao i druga lica, koja se po bilo kojem osnovu nalaze zadržavaju u objektu, prostorijama i krugu JU Collegium artisticum.

II-ORGANIZOVANJE I OSTVARIVANJE ZAŠTITE OD POŽARA

Član 5. **(Organizacija)**

- (1) Zaštita od nastanka požara u građevinama, građevinskim dijelovima i prostoru JU Collegium artisticum obuhvata organizovanje kao i druge mjere i radnje koje imaju zadaću:
 - a) Otklanjanje uzroka i smanjenja opasnosti od nastajanja požara, eksplozija i sl.;
 - b) Otkrivanje i gašenje požara te poduzimanje potrebnih mjera radi sprečavanja širenja požara, odnosno bržeg gašenja požara;
 - c) Spašavanje ljudi, imovine JU Collegium artisticum i sl.;
 - d) Pružanje pomoći i otklanjanje posljedica uzrokovanih požarom.

III-UNUTRAŠNJA KONTROLA SPROVOĐENJA MJERA ZAŠTITE OD POŽARA

Član 6. (Odgovorna lica)

- (1) Za uspješno funkcionisanje i za kontrolu utvrđenih, propisanih i naloženih mjera zaštite od požara, odgovorni su radnici JU Collegium artisticum, kako je i regulisano ovim Pravilnikom.
- (2) Neposrednu unutrašnju kontrolu sprovođenja mjera zaštite od požara vrši svako u svom djelokrugu rada:
 - a) Direktor JU Collegium artisticum;
 - b) Radnici JU Collegium artisticum.
- (3) Prilikom vršenja unutrašnje kontrole sprovođenja mjere zaštite od požara, obavezno se, na licu mjesta, o nađenom činjeničnom stanju sastavlja službena zabilješka ili odgovorajući zapisnik.

Član 7. (Nadzor nad ispravnnošću instalacija)

- (1) Nadzor nad ispravnnošću električnih instalacija na zahtjev JU Collegium artisticum obavlja ovlašteno preduzeće ili radnja, odnosno druga pravna osoba u skladu sa Zakonom i propisima doonesenim na osnovu Zakona.
- (2) O ispravnosti instalacija iz stava (1) ovog člana, JU Collegium artisticum mora posjedovati dokumentaciju ovlaštenog preduzeća ili radnje.
- (3) Ispitivanje ispravnosti sistema za gašenje ili dojavu požara vrši se najmanje dva puta godišnje.
- (4) O ispitivanju ispravnosti sistema, mora postojati dokumentacija sa datumom pregleda i nedvosmislenom konstatacijom o ispravnosti.

Član 8. (Nadzor nad radom uređaja centralnog grijanja)

- (1) Nadzor nad radom uređaja centralnog grijanja obavlja Energetičar-kotlovnica JU Collegium artisticum, svakodnevno tokom rada uređaja, te periodično.
- (2) Periodični pregled mora se obaviti najmanje jednom u godini dana.

IV-PLANIRANJE I PROVOĐENJE MJERA ZAŠTITE OD POŽARA

Član 9. (Opšte mjere)

(1) Opšte mjere zaštite od požara su:

- a) Adekvatna obuka iz oblasti zaštite od požara;
- b) Zapaljiva osnovna i druga sredstva, tvari sklone samozapaljivanju, otrovne ili nagrizajuće tvari ili tvari koje se mogu zapaliti ili eksplodirati zbog djelovanja vode ili kisika, upaljive tekućine i sl., mogu se držati ili skladišiti u propisano izvedenom i zaštićenom prostoru, spremnicima, ormarima, policama i sl.;
- c) U svim građevinama, građevinskim djelovima i prostorijama JU Collegium artisticum (u daljem tekstu: građevine i prostori), osim za to određenih, zabranjuje se korištenje uređaja i aparata koji mogu prouzrokovati nastajanje i širenje požara (grijalica, kuhala, električnih radijatora, kalorifera i drugih električnih aparata);
- d) Postrojenja, uređaji, električne, plinske, ventilacijske, toplinske, gromobranske i druge instalacije, dimnjake i ložišta koji mogu prouzrokovati nastajanje i širenje požara, u građevinama i prostorijama JU Collegium artisticum, moraju biti izvedene prema tehničkim normativima, normama i uputama proizvođača, o čemu JU Collegium artisticum mora posjedovati dokumentaciju o ispravnom stanju;
- e) Za izvedene stabilne instalacije namijenjene za gašenje ili dojavu požara, te druge zaštitne uređaje i instalacije koje služe za sprečavanje nastanka širenja eksplozije i požara, potrebno je da JU Collegium artisticum pribavi ispravu ovlaštene pravne osobe i dati ih na uvid komisiji za tehnički pregled;
- f) Odmah prestati sa upotrebom građevine, postrojenja, uređaja, instalacija i dr. ako se njihovim preuređenjem ne može otkloniti nastanak koji može prouzrokovati požar;
- g) Ukloniti zapaljive tvari koje su ugrađene u konstruktivne elemente građevine ili kojima su obrađene horizontalne i vertikalne površine izlaza i izlaznih puteva, ako ti elementi predstavljaju opasnost za nastajanje ili brzo širenje požara;
- h) Periodični pregled instalacija i spojeva (posebno utikača i utičnica, prekidača i sl.) i vođenje evidencije o kontrolnim pregledima;
- i) Pravilno izvesti sistem ventilacije iz ugroženog prostora;
- j) Građevine i prostor JU Collegium artisticum moraju biti opskrbljeni uređajima, opremom i sredstvima za gašenje požara (hidratanski vodovi) stabilni ili pokretni uređaji za gašenje požara i druga oprema;
- k) Vatrogasni pristupi/prilazni putevi, ulazi, izlazi, prolazi u svim građevinama i prostorima JU Collegium artisticum moraju biti slobodni za brz i siguran izlazak iz ugrožene građevine ili prostora, te operativni vatrogasni rad;
- l) Prostor oko hidranta mora biti slobodan;
- m) Kvar na sistemu za dobavu vode i hidratantskoj instalaciji obavezno odmah otklanja stručni radnik;
- n) Zapaljiva ambalaža, istrošeni materijali i drugi otpatci se svakodnevno iznose iz prostorija i odlažu na odgovarajuće mjesto;
- o) Zapaljive tekućine se ne bacaju u kanalizacionu mrežu.

Član 10. **(Građevinske mjere)**

- (1) Rekonstrukcija, adaptacija i dogradnja postojećeg objekta, mora se vršiti na osnovu odgovorajuću tehničke dokumentacije, koja mora sadržavati i mjere zaštite od požara, a što se utvrđuje pregledom tehničke dokumentacije od strane stručnog tijela ili organizacije.
- (2) Zabranjeno je mijenjati projektovanu namjenu objekta i prostorija bez odobrenja nadležnog organa i poduzimanja mjera zaštite od požara. U neposrednoj blizini objekata za skladištenje i držanje zapaljivih materija, mora se postaviti predviđeni broj aparata za početno gašenje požara.
- (3) Požarni putevi moraju neprekidno biti slobodni i prohodni cijelom svojom širinom. Svi prilazni putevi do objekta, kao i unutrašnje komunikacije u objektu (hodnici, stepeništa, vrata itd.) moraju uvijek biti slobodni i prohodni cijelom svojom širinom.
- (4) U cijelom objektu moraju se obezbijediti odgovarajući prilazi do izlaznih vrata, hidranata, vatrogasnih aparata i glavnih razvodnih ormara električne energije.
- (5) Zabranjeno je parkiranje vozila na požarnim putevima oko objekta, kao i na mjestima koja nisu predviđena za to, a za te svrhe treba koristiti odgovarajuće uređeno parkiralište koje ne smeta prilazu objektu.

Član 11. **(Elektro-mjere)**

- (1) U prostorijama JU Collegium artisticum dozvoljena je upotreba samo onih električnih uređaja i instalacija, koje po svojim tehničkim karakteristikama odgovaraju tehničkim propisima i pogonskim zahtjevima. Električni uređaji i instalacije moraju biti tako izvedeni i zaštićeni da usljed djelovanja pogonskih uslova (vlaga, prašina, zapaljive pare i gasovi, mehanička oštećenja, toplotoni i hemijski uticaji itd.) ne bude ugrožena sigurnost ljudi, objekata i predmeta rada.
- (2) Prema tehničkim propisima i uputstvima, te propisanim rokovima, obavezno je vršiti kontrolu ispravnosti i odgovarajuća mjerenja električnih uređaja i instalacija, te preuzimati mjere na otklanjanju uočenih nedostataka. Popravke i druge radove na električnim instalacijama, mogu vršiti samo stručno osposobljena lica, koja, prije bilo kakve intervencije, moraju instalacije dovesti u beznaponsko stanje.
- (3) Poslije završenog rada, tamo gdje je to uputstvima predviđeno, mora se isključiti dotok električne energije na glavnoj sklopki dotičnog objekta ili prostorije, a pod naponom može ostati samo noćna i sigurnosna rasvjeta, odnosno neophodni potrošači.

- (4) Razvodne električni ormari moraju imati prekidač na glavnom dovodu električne energije. Sva oprema u razvodnim baterijama i ormarima, mora biti označena prema jednopolnoj šemi koja se mora nalaziti u ovom razvodima. Osigurači u razvodima ne smiju se krpiti nego se mijenjaju samo novim osiguračima iste nazivne snage, a bimetali moraju biti podešeni na normalnu struju motora.
- (5) U prostorijama ugroženim od požara i eksplozije, instalacije se moraju izvoditi sa uređajima koji neće prouzrokovati požar ili eksploziju. S-uređaji (prekidači, sklopke i sl. Koji su ugrađeni u zaštitne oklope ili drugu vrstu zaštite za sprečavanje pojave iskre u okolnom prostoru pri uključivanju/isključivanju uređaja).
- (6) U prostorima u kojima se pojavljuje vlaga i voda, nulovanje sprovoditi sa posebnom zaštitnom vodom.

Član 12. **(Gromobranske instalacije)**

- (1) Zgrada kao i svi ostali objekti moraju biti obezbjeđeni sa odgovarajućim klasičnim gromobranskim instalacijama u skladu sa odredbama tehničkih propisa za gromobrane.
- (2) Obavezna je periodična kontrola ispravnosti gromobranskih instalacija i uzemljenja, te otklanjanje uočenih nedostataka u skladu sa tehničkim propisima. Za gromobranske instalacije mora se voditi i čuvati odgovarajuća tehnička dokumentacija i evidencija.

V-RAD SA ZAPALJIVIM TEČNOSTIMA I TEHNIČKIM GASOVIMA

Član 13. **(Zapaljive tečnosti i tehnički gasovi)**

- (1) Zapaljivim tečnostima i tehničkim gasovima mogu da rukuju samo radnici koji su za to posebno stručno osposobljeni ili druga stručna lica.
- (2) Pri rukovanju zapaljivim tečnostima i tehničkim gasovima, radnici su dužni da rade sa posebnom pažnjom i da primjenjuju propisane mjere zaštite od požara.
- (3) Pri rukovanju zapaljivim tečnostima i tehničkim gasovima naročito je zabranjeno: pušiti, raditi sa otvorenim plamenom i upotrebljavati alat koji varniči, te rasipati zapaljive tečnosti.
- (4) Skladište zapaljivih tečnosti i tehničkih gasova smije se vršiti samo u skladištima koja moraju odgovorati tehničkim propisima za ovu vrstu materijala, uz obavezu provjetravanja, kako bi se izbjeglo stvaranje zapaljivih smjesa sa vazduhom.

IV-UPOZNAVANJE I OBUKA RADNIKA

Član 14. (Stručno osposobljavanje i obuka radnika)

- (1) JU Collegium artisticum je obavezna provoditi stručno osposobljavanje i usavršavanje svih radnika koji se nalaze u radnom odnosu za provođenje mjera zaštite od požara na radnim mjestima na kojima se nalaze.
- (2) Obuka i osposobljavanje obuhvata upoznavanje radnika sa rasporedom svih prostorija u JU Collegium artisticum, kao i rasporedom svih komunikacija (ulazi, izlazi, hodnici, stepeništa), sa svim izvorima opasnosti i načinu provođenja mjera zaštite od požara utvrđenih ovim Pravilnikom.
- (3) Obavezno je najmanje jednom u dvije godine izvršiti obuku i provjeru znanja iz oblasti zaštite od požara svih zaposlenih lica prema posebnom programu obuke.
- (4) Upoznavanje i obuka radnika vrši se putem odgovarajućih predavanja i kroz praktičnu obuku.
- (5) Obuku mogu vršiti odgovarajuće stručne organizacije ili stručni radnici.
- (6) Nakon izvršene obuke radnika vrši se provjera znanja radnika (usmeno ili pismeno testiranje).
- (7) Provođenje obuke i provjera znanja radnika iz oblasti zaštite od požara vrši se u skladu sa odredbama pozitivno-pravnih propisa koji regulišu ovu materiju i odredbama ovog Pravilnika.

VII- OBAVEZE I ODGOVORNOSTI DIREKTORA I RADNIKA JU COLLEGIUM ARTISTICUM

Član 15. (Odgovornost direktora)

- (1) Direktor JU Collegium artisticum u okviru svoje nadležnosti ima sljedeće dužnosti:
 - a) Osigurava provođenje ovog Pravilnika;
 - b) Određuje i imenuje radnika koji će biti zadužen da se stara o provođenju mjera zaštite od požara u JU Collegium artisticum;
 - c) Organizuje periodične preglede električnih instalacija, uređaja, gromobranskih instalacija i slično, a po pitanju primjene mjera iz oblasti zaštite od požara;
 - d) Organizuje obuku radnika iz oblasti zaštite od požara te upoznaje radnika prilikom stupanja na rad sa odredbama ovog Pravilnika;
 - e) Stara se o obezbjeđenju radnih mjesta, gdje prijete opasnost od izbijanja požara;
 - f) Razmatra stanje zaštite od požara u JU Collegium artisticum najmanje jedanput godišnje;

- g) Obezbjeduje potrebna sredstva za sprovođenje mjera iz oblasti zaštite od požara, te vrši nabavku sredstava i opreme za gašenje požara;
- h) Nadgleda i kontroliše rad ostalih radnika po pitanju sprovođenja propisa, uputstva i mjera iz oblasti zaštite od požara;
- i) U slučaju potrebe angažuje stručne saradnike iz oblasti zaštite od požara;
- j) Zabranjuje pušenje u radnim prostorijama gdje prijeti opasnost od izbijanja požara;
- k) Pokreće disciplinski postupak zbog povrede radne obaveze protiv radnika koji ne sprovodi propisane mjere zaštite ili se ne pridržava propisanih odnosno naređenih mjera zaštite od požara;
- l) Obavlja i druge poslove u skladu sa odredbama pozitivno-pravnih propisa, a koje su neophodne za bezbjednost objekta i lica po pitanju zaštite od požara.

Član 16. **(Odgovornost radnika)**

- (1) Svaki radnik JU Collegium artisticum, kao i lica koja su po bilo kojem osnovu radno angažirana u JU Collegium artisticum ima sljedeće obaveze, prava i odgovornosti iz oblasti zaštite od požara:
 - a) Da se prilikom stupanja na rad, odnosno raspoređivanja na poslove i radne zadatke, upozna sa odredbama ovog Pravilnika, izvorima opasnosti i mjerama iz oblasti zaštite od požara na radnom mjestu na koje je raspoređen;
 - b) Da svoje poslove i radne zadatke obavlja stručno i savjesno kako bi se izbjegla svaka opasnost za nastanak i širenje požara;
 - c) Da opremu i sredstva za gašenje požara čuva od oštećenja, da se pridržava svih uputstava, pravila, propisa i mjera zaštite od požara;
 - d) Da usavršava svoja znanja iz oblasti zaštite od požara, te ima pravo da predlaže mjere za poboljšanje i unapređenje sistema zaštite od požara kroz sistem obavezne obuke;
 - e) Da upozorava svoje radne kolege na propuste iz domena zaštite od požara, te da o tim propustima izvještava neposrednog rukovodioca;
 - f) Da neposrednom rukovodiocu odmah prijavi svaki uočeni kvar ili sumnjivu pojavu u procesu rada koja može imati za posljedicu pojavu požara i njegovo širenje;
 - g) Obavezan je da vizuelno svakodnevno kontroliše ispravnost opreme, aparata i sredstava za gašenje požara, te da svaki uočeni kvar ili nedostatak, odmah prijavi neposrednom rukovodiocu;
 - h) Da odmah čim primjeti izbijanje požara pristupi njegovom gašenju sa svim raspoloživim sredstvima, ukoliko ocjeni da požar može ugasiti bez opasnosti po sopstveni život ili zdravlje;
 - i) Da prije početka rada provjeri ispravnost sredstva rada, te da po završetku rada, a prije napuštanja radne prostorije, poduzme sve propisane mjere da se spriječi nekontrolisano izbijanje požara;
 - j) Raditi duže od propisanog radnog vremena u slučajevima kada je neophodno spriječiti izbijanje požara i drugih nezgoda;
 - k) Da odbije raditi određene poslove, ako ocijeni da prijeti neposredna opasnost za njegovo zdravlje i život od požara i eksplozije;

- l) Da zahtjeva da se u sklopu odvijanja procesa rada na vidno mjesto istaknu odgovarajuća uputstva za siguran rad i upozorenja na opasnost od požara i eksplozije.
- (2) Radnik je naročito odgovoran ako:
 - a) Namjerno ili nepažnjom izazove požar;
 - b) Ostavlja zapaljive materije na mjestu koja za to nisu određena;
 - c) Bez opravdanog razloga odbije da učestvuje u gašenju požara;
 - d) Neodgovorno se odnosi prema opremi i sredstvima za gašenje požara, ili ih koristi u nedozvoljene svrhe;
 - e) Neopravdano ili bez ikakve potrebe daje znak za izbijanje požara;
 - f) Ne sprovodi proisane mjere iz oblasti zaštite od požara i poslove obavlja mimo uputstva i tehničkih propisa;
 - g) Upotrebljava otvoreni plamen ili puši u prostorijama gdje je to zabranjeno.

VIII- DUŽNOSTI RADNIKA U SLUČAJU IZBIJANJA POŽARA I NJIHOVO PONAŠANJE

Član 17.

(Dužnost radnika u slučaju izbijanja požara)

- (1) Pored protivpožarnog alarma svaki radnik JU Collegium artisticum u skladu sa odredbama Zakona i propisima donesenim na osnovu Zakona i odredbama ovog Pravilnika, u slučaju nastanka požara ili neposredne opasnost od nastanka požara, dužan je:
 - a) Odmah otkloniti opasnost od nastanka požara/ugasiti požar ako je to u mogućnosti bez ugrožavanja života drugog ili svog vlastitog;
 - b) Ako radnik ne može sam ugasiti požar, dužan je odmah na prikladan način/pokušavajući izbjeći paniku/glasom izgovoriti POŽAR/ sa naznakom u kom dijelu objekta je nastao/;
 - c) Upozoriti najbliže o nastalom događaju, izvjestiti direktora JU Collegium artisticum ili radnika zaduženog za provođenje mjera zaštite od požara, odnosno u slučaju njihove odsutnosti najbližu vatrogasnu jedinicu, policijsku upravu ili operativni centar civilne zaštite;
 - d) Po upoznavanju/alarmiranju pristutnih u objektu JU Collegium artisticum, lice koje je primjetilo požar telefonskim pozivom na 123 ili 121 obavještava najbližu vatrogasnu jedinicu ili operativni centar civilne zaštite o nastaslom požaru;
 - e) Radnici koji su primjetili požar ili su pozvani u pomoć radi nastanka požara, obavezni su sačekati dolazak vatrogasne jedinice, odmah svim raspoloživim vatrogasnim aparatima ili drugom odgoovrajućom opremom, uređajima i sredstvima gasiti nastali požar i dati potrebne podatke rukovodiocu akcije gašenja požara i spašavanja;
 - f) Pomagati vatrogasnoj jedinici u gašenju požara;

- g) Broj radnika na mjestu požara odnosno požarnom sektoru ovisi o procjeni direktora JU Collegium artisticum, odnosno osobe koja rukovodi gašenjem požara i trenutnoj požarnoj situaciji;
- h) Dati potrebne podatke o predmetima ili osobama koji mogu poslužiti za utvrđivanje uzroka požara.

Član 18. (Odgovornost radnika)

- (1) Svaki radnik JU Collegium artisticum odgovoran je za provođenje mjera zaštite od požara utvrđenih ovim Pravilnikom.
- (2) Radnik koji svojom krivnjom ne provede propisane mjere zaštite, ne pridržava se propisanih mjera zaštite od požara te dužnosti u slučaju nastanka požara čini težu povredu radne obaveze u skladu sa Pravilnikom o radu JU Collegium artisticum i pravnoj odgovornosti.
- (3) Odgovornost iz stava (2) ovog člana ne isključuje krivičnu i materijalnu odgovornost.

Član 19. (Dužnost direktora JU COLLEGIUM ARTISTICUM u slučaju izbijanja požara)

- (1) Neposrednim gašenjem požara do dolaska vatrogasne jedinice rukovodi direktor JU Collegium artisticum.
- (2) U slučaju iz stava (1) ovog člana direktor JU Collegium artisticum na osnovu procjene požarne situacije organizira:
 - a) Dopremu vatrogasnih aparata, druge opreme i sredstava za gašenje požara na mjesto gašenja te organizuje raspored radnika i njihovo sudjelovanje u gašenju požara;
 - b) Nalaže da se odmah započne s gašenjem požara;
 - c) Nalaže isključenje električne energije i plina: upotrebu ličnih zaštitnih sredstava;
 - d) Uklanjanje zapaljivih tvari iz požarnog sektora;
 - e) Poduzima mjere za sprečavanje širenja požara;
 - f) Poduzima mjere za sprečavanje nastanka panike;
 - g) Nalaže i organizira udaljavanje radnika i opreme iz objekta JU Collegium artisticum;
 - h) S mjesta gašenja požara udaljava radnike koji nemaju zadatak u gašenju požara;
 - i) Poduzima potrebne mjere kako bi se sačuvali tragovi i predmeti koji mogu poslužiti za utvrđivanje uzroka nastanka požara.

Član 20.
(Popravak i zamjena oštećenih uređaja)

JU Collegium artisticum je dužna nakon požara upotrebljenju opremu, uređaje u druga sredstva dovesti u ispravno stanje.

IX-PLAN ZAŠTITE OD POŽARA I NJEGOVO PROVOĐENJE

Član 21.
(Plan zaštite)

- (1) U cilju ostvarivanja razvoja i unapređivanja zaštite od požara JU Collegium artisticum donosi Plan zaštite od požara.
- (2) Plan zaštite od požara obuhvata naročito:
 - a) Analizu i procjenu ugroženosti od požara;
 - b) Organizaciju zaštite od požara;
 - c) Sistem obavještanja i davanja uzbune;
 - d) Postupak u slučaju požara;
 - e) Tehničku opremu i sredstva za gašenje požara;
 - f) Način snadbjevanja vodom;
 - g) Puteve, prolaze i prilaze;
 - h) Lokaciju i klasifikaciju objekta prema namjeni i prema stepenu opasnosti od požara;
 - i) Zaštitne zone i mogućnosti prenošenja požara.
- (3) Planom zaštite od požara preventivno se utvrđuju izvori opasnosti od izbijanja požara i sagledavanje mogućnosti zaštite od požara.
- (4) Planom zaštite od požara utvrđuju se obaveze i zadaci koji se trebaju izvršiti u periodu za koji se program odnosi, rokovi i način izvršenja obaveza i zadataka. Takođe se određuju radnici JU Collegium artisticum koji su odgovorni za njegovo provođenje.
- (5) Plan zaštite od požara sadrži mjere koje se odnose naročito na:
 - a) Kontrolu ispravnosti aparata i opreme za gašenje požara;
 - b) Kontrolu stanja u objektu i prostorijama JU Collegium artisticum sa stanovišta zaštite od požara, elektro instalacije, gromobranske instalacije, instalacije, grijanja i sl.;
 - c) Kontrolu održavanja stalnih prolaza, prilaza, ulaza i izlaza i sl.;
 - d) Kontrolu uskladištene robe po vrstama i količini, a posebno kontroli zapaljive robe, lako zapaljivih tekućina i plina;
 - e) Kontroku otklanjanja ranije utvrđenih nedostataka u radnim i pomoćnim prostorijama kao i drugim mjestima na kojima radnici rade ili se kreću.

X-EVAKUACIJA I PLAN EVAKUACIJE

Član 22. (Plan evakuacije)

- (1) Iz radnih prostorija JU Collegium artisticum u svakom trenutku mora biti omogućena bezbjedna evakuacija radnika za vrijeme izbijanja požara, a putevi za evakuaciju moraju biti vidljivo označeni, stalno slobodni i prohodni.
- (2) Svi radnici JU Collegium artisticum treba da znaju pravce svih nužnih izlaza, protivpožarnih stepeništa i zbornog mjesta.
- (3) U skladu sa donešenim i uvježbanim Planom za evakuaciju u slučaju opasnosti svi radnici JU Collegium artisticum moraju mirno i bez panike početi evakuaciju.
- (4) Kretanje evakuacionim putevima treba provoditi u koloni, bez pretrčavanja kako se nebi dodatno stvarala panika i mogućnost zakrčenja i zaglavljivanja na izlazima.
- (5) Na mjestu za okupljanje obavezno se vrši provjera prisutnosti svih koji su se u momentu nastanka požara zatekli u objektu JU Collegium artisticum.
- (6) Nakon evakuacije, dio radnika se može vratiti na mjesto požara i staviti na raspolaganje rukovodiocu akcije gašenja požara i spašavanja u slučaju potrebe pružanja pomoći u toku intervencije.

XI-OPEMA ZA GAŠENJE POČETNIH POŽARA

Član 23. (Vatrogasna oprema)

- (1) U JU Collegium artisticum se postavlja vatrogasna oprema, uređaji i sredstva za gašenje požara.
- (2) Vatrogasnu opremu, uređaje i sredstva za gašenje požara iz stava (1) ovog člana čine vatrogasni aparati i sistemi za dojavu i gašenja požara.
- (3) JU Collegium artisticum posjeduje instaliranu automatsku detekciju i dojavu požara, sistemi za detekciju dima i toplote i elektronsku alarmnu adresabilnu sirenu.

Član 24. **(Vatrogasni aparati)**

- (1) Vatrogasni aparati postavljaju se na sljedeća mjesta u objektu JU Collegium artisticum:
 - a) Lako dostupna mjesta;
 - b) U prolazu ili hodniku.
- (2) Jedinični vatrogasni aparati mogu biti: prah 6 kg ABC, prah 9 kg ABC i CO2 5 kg.
- (3) Svaki vatrogasni aparat mora biti označen naljepnicom. Bušenjem rupe na naljepnici treba označiti dan, mjesec i godinu izvršenog pregleda.
- (4) Prilikom zamjene naljepnice, kod periodičnog pregleda, na novu naljepnicu treba prenijeti godinu prethodnog kontrolnog ispitivanja.
- (5) U prostorima JU Collegium artisticum moraju se postaviti vatrogasni aparati i u slučaju kad imaju ugrađenu stabilnu instalaciju za gašenje požara i hidrantsku mrežu.

Član 25. **(Sistem vatrodojave)**

- (1) Sistem vatrodojave ima svrhu ranog otkrivanja i gašenja požara sa jednom centralom smještenom na zidu, u jednoj prostoriji, otvorenoj i dostupnoj u svakom trenutku, javljačima dima i temperature, elektronskim alarmom i adresabilnom sirenom.
- (2) Za kontrolu sistema vatrodojave centrala posjeduje višekriterijumski dimni i temperaturni javljač koji ima mogućnost da radi kao javljač dima, javljač temperature i kao kombinovani dimno/temperaturni javljač.
- (3) Svaki javljač ima ugrađen izolator petlje koji u slučaju kratkog spoja ili prekida linije omogućuje nesmetan rad javljača.

Član 26. **(Hidratantska mreža)**

- (1) Hidratantska mreža mora biti projektovana i tako izvedena da prilikom gašenja požara mlaz može doprijeti do svake prostorije u JU Collegium artisticum.
- (2) Mreža iz stava (1) ovog člana mora osigurati odgovarajući pritisak i protok vode dovoljan za djelotvorno gašenje požara. Suha hidrantska mreža mora imati odgovarajuću nepropusnost i prohodnost cjevovoda koja će osigurati brzo i djelotvorno gašenje.

Član 27.

(Pregled i ispitivanje ispravnosti aparata i hidrantske mreže)

- (1) Pregled i ispitivanje ispravnosti vatrogasnih aparata i hidrantske mreže obavlja se na sljedeće načine:
- a) Svakodnevno se vrši vizualni pregled ispravnosti vatrogasnih aparata i hidrantske mreže;
 - b) Dva puta godišnje (svakih šest mjeseci) obavlja se periodični pregled vatrogasnih aparata i hidrantske mreže;
 - c) Kontrolno ispitivanje vatrogasnih aparata i hidrantske mreže obavlja ovlašteno preduzeće;
 - d) Ovlašteno preduzeće, obavezno je da o izvršenom periodičnom pregledu vodi evidenciju, a o kontrolnom ispitivanju sačiniti izvještaje, te ih dostaviti JU Collegium artisticum u roku od 8 (osam) dana od dana izvršenog periodičnog pregleda odnosno kontrolnog ispitivanja.

XII- OSTALE ODREDBE

Član 28.

(Sredstva za provedbu mjera zaštite)

Sredstva za provedbu mjera zaštite od požara osiguravaju se u godišnjem Budžetu JU Collegium artisticum, u skladu sa godišnjim Planom i Programom rada.

Član 29.

(Nadzor nad provedbom mjera zaštite)

- (1) Nadzor nad provedbom mjera zaštite od požara vrše inspektori za zaštitu od požara.
- (2) Prilikom vršenja nadzora, JU Collegium artisticum je obavezna omogućiti inspektoru za zaštitu od požara pregled centralnog objekta i prostora te poduzimanje drugih radnji neophodnih za utvrđivanje primjene propisanih mjera zaštite od požara.

XIII- PRIJELAZNE I ZAVRŠNE ODREDBE

Član 30.

(Ravnopravnost spolova)

Odredbe ovog Pravilnika odnose se podjednako na lica muškog i ženskog roda, bez obzira na rod imenice upotrebljen u tekstu Pravilnika.

Član 31.
(Izmjene i dopune)

Izmjene i dopune ovog Pravilnika provode se na način i u postupku utvrđenom za njegovor donošenje.

Član 32.
(Stupanje na snagu)

- (1) Ovaj Pravilnik stupa na snagu danom donošenja.
- (2) Ovaj Pravilnik će biti objavljen na Oglasnoj ploči i web stranici JU Collegium artisticum.



Alma Hadžić, predsjednica
Upravnog odbora JU „Collegium artisticum“

Broj: 02-64-2/25
Sarajevo, 26. februar 2025. godine

